

# Athör Jut

## Wet nom

Athör Jut acī gōt bī kōc lek bīk nhīim tīr kōc piöoc ē lueth, kōc ye lueel lōn ye kek kōc cī gam. Kē tō athör cieik kēnē yic, yen athōh kek athör rou ē Pīter, raan ē kōc bī ye kueen deet puōth, bīk ηuot ke la tueh kek gam wäär cī Nhialic gām kōcken cī wetde gam.

## Käk tō thīn

Muōth 1-2

Awuōc bī kōc piöoc ē lueth yök 3-16

Riel ē puōu gam yic 17-23

Röök 24-25

**1** <sup>1</sup> Ee yen Jut, yen alony Jethu Krītho. Ku ya menhē Jemith. Yen aget kōc cī Nhialic ke cōl, kōc pīr ē nhiēr Nhialic Wāda. Ku tit Jethu Krītho ke. <sup>2</sup> Calkē döör ku nhiēr ku pel piny ē wēl arēer kek we atheer.

## Kōc piöoc ē lueth

<sup>3</sup> Wek kōckien nhiaar, aca them apei ba we gāt te cī Jethu Krītho yo kuony thīn yodhie. Ku kē ca tak ē kē bī yen we gāt nyin yic emēn. Ku ba we deet puōth, bāk la tueh kek gam wäär cī Nhialic gām kacke bī rēer ke ke. <sup>4</sup> Rin cī kōc rec kuc Nhialic rōt kuel yoyiic ke kucku ke. Ku reckē wet puoth ē Nhialic bī kek dhōlken rec thiaan kōth thīn. Ku jeikē Jethu Krītho ku ye Bānyda. Ku athör theer wēl Nhialic acā awuōc bīk yök thīn nyuōoth wātheer.

<sup>5</sup> Na cōk alōn ηic wek kākā ēbēn, ka wiēc ba ben tāk we, yen tēyon cī Nhialic kōc Itharel luāk thīn tēnē kōc pan Ijip. Ku te cī yen kōc kōk kamken ke cī jai ē wetde ben rac thīn. <sup>6</sup> Ku takkē aya, lōn atuuc nhial wäär cī luōiden bar nyin ku kueeckē bīk rēer teden cī tek ke, aa rēer ke ke der akōlakōl ē muōōth yic piiny. Te muk Nhialic ke thīn yet akōl luōdīt bī ke jal tem awuōc thiek.

<sup>7</sup> Ku muōkkē wenhīim aya yen kēwäär cī rot looi tēnē Thodom ku Gomora, ku beei thiōk ke ke. Wäär cī kōc ke rēer ē geethkā yiic luui cimēn atuuc nhialkā, kōc wäär cī kepuōth yiēk bal. ku kuat kārec kōk ye kek rōt lōōm. Ku emēn aacī tem awuōc cī ke cuat many akōlriēc ēbēn yic. Ku bī nyuōth raan ēbēn yen awuōc ye gām kōc cī luui kārec.

<sup>8</sup> Ku kōc rec cī rōt kuel yoyiic kā, aa la kākken ke nyuōth ke kēya bīk awuōc aa looi kegup ē rōt. Aacī riel Nhialic dhōl yic ku lueelkē kārec atuuc nhial gup. <sup>9</sup> Na cōk aa tundyit atuuc nhial nhīim cōl Maikel ka kēc looi. Wäär gōth yen kek jōhrac, yōn teer kek ye, yeηa bī guōp Mothith nyaai, yen Maikel nom akēc jōhrac ben lat, acī ben lueel ēlā, “Nhialic abī yī tem awuōc!” <sup>10</sup> Ku kōckā aa kōc māt ku leetkē kōc kē kēc deet yic, ku kāk ηickē ke cik ye tak yiic, cimēn lāāi ē path, luoi ē kākā abī Nhialic ke nōk. <sup>11</sup> Abī rēec apei tēnē ke! Ee dhēl Kain yen acīk buōoth yic. Ee rin wēēu ē path yen aye kek awuōc wäär cī Balaam looi, looi aya. Aacī kēec wei tēnē Nhialic cimēn Kora, ku aabī Nhialic nōk cimēn wäär nek yen Kora. <sup>12</sup> Ku keek aa yār guōp beei tēnē we, te looi kek kāreckā ke cī gup riōc, te mīth wek ke ke akuōtdun yic. Ayekē nhiaar kē la guāpden yic kepec. Aa cīt luāāt ye yom kuaath ku cīi tueny. Aa cīt tiim cie luōk te cōk yen a rut, tiim cī meiken nyuān bei. Kōckā aa thou arak rou ē luoi adumuōōm, ku kākken rec yekē ke looi cōk alōn ye kek kōc cī gam. <sup>13</sup> Aa rōt jat nhial cimēn apuōōk ē wārdīt yic, bīk teden rēec kek thīn nyuōoth. Aacīt kuel cī yiec dhēlden yekē buōoth yic, ē rin cī Nhialic tecol bī yen ke cuat thīn looi tēnē ke akōlriēc ēbēn.

<sup>14</sup> Enok, raan kāk Nhialic tīh, manh ye kuat Adam yic dhorou yen ēcī ye lueel theer ē rienken ēlā, “Nhialic abī ben kek atuucken juēc apei cīi kuen, <sup>15</sup> bīk luk ben looi tēnē kōc. Ku kōc la gup adumuōōm cī kuc ye, aabī tem awuōc rin kārec juēc cik looi. Ku kārec cik lueel yeguōp!”

<sup>16</sup> Kōckā aa Nhialic gōk akōlakōl ke nyieny kōc kōk. Ee luoi ē dhōlken rec kek ayekē ke buōoth yiic. Aa jam ē nhiam rienken ē rōt. Ku yekē kōc kōk math nyin bīk ke buōoth cōk.

## Tir ë nhom ku lëk

<sup>17</sup> Ku yeen muökkë wenhiim wek kockien nhiaar, yen këwäär ci atuuc Bännya Jethu Kritho lek we. <sup>18</sup> Acik lek we ëlä, “Të le aköl lundit thiök, ke koc kök ræc, koc ke looi kæk wic piäthken kepec aabi tuöl. Ku keek aabi we aa bui.” <sup>19</sup> Kockä kek aa koc tæk yiic, koc ye buoöth yic dhöl koc ë path, keek aa cïn gup Wëi Nhialic. <sup>20</sup> Ku week kockien nhiaar lak tuej gamdun yic apath cimen ye Wëi Nhialic we kony bæk aa röök. <sup>21</sup> Ku muökkë röt ë nhiër Nhialic yic, ke we tit Bännya Jethu Kritho, bi we ben nyuöth te nhiëer yen we thin ku gam we pir akölrïëc ëbën.

<sup>22</sup> Yakë koc not ke diu nyuöth piathdun. <sup>23</sup> Kuonykë koc kök bik cii la mæc. Ku nyuöthkë piathdun tënë koc kök, ke we tit röt ë ke bik we cii riöp acol käracken yiic, ku bæk cii la dhölken yiic, dhöl adumuööm.

## Röök

<sup>24</sup> Tënë Nhialic, raan lëu ye bi we muk bæk cii lööny wei. Ku bii we, ku cöl we akäac yenhom dieckde yic ke we mit puöth, ke cïn këreec ræer ke we, <sup>25</sup> tënë Nhialic, yen Nhialic töj tö thin, yen yo kony, rin Jethu Kritho Bännya, bi ya leec, ee dietde, ee riel, ku bäännye, akölë, ku theer, ku akölrïëc ëbën! Yenakan.